

**04 SEPTEMBRIE**  
**RUGĂCIUNEA 1**  
**SF. CUVIOS**  
**DANIEL DE LA ELISABETGRAD**  
**МОЛИТВА**

О, досточудне и всеблаженне отче наш Данииле, землю Елисаветградскую житием и подвиги своими освятивый и чудесы твоими людем православным помощь доныне обильно подающий. Прославляюще прославльшаго тя Господа, во святых Своих дивнаго, славословие тебе приносим и усердно молим тя: отче блаженне, молитвами твоими яже к Богу сохрани Град наш и Отчество от всякия беды и напасти, огради ходатайством твоим Церковь нашу Святую и умири всякое нестроение и соблазн, от врага всеваемый, даруй нам дух ревности и терпения, дух разума и любви, обнови страх Божий в сердцах наших и возгрей их пламенем непрестанная молитвы. Ей, Данииле Богомудре, сохрани всех нас от соблазнов и грехопадений, от злобы и неправды, от искушений и страстей и вся люди православная во исповедании отеческия веры укрепи, да купно с тобою и со всеми святыми прославим Всеблагаго Бога, Отца и Сына и Святаго Духа во веки веков. Аминь.